

Tirittèra di Merrulédhha

di Anna Maria Giagheddu

Merrulédhha Merrulédhha
Da cana ti sé' fatta niédhha
Pa' lu tantu fritu e nì
No sé' 'sciuta più da chì
Candu poi ài presu bólu
'Scèndi da lu fumaiólu
Lu fritu era ghjà agabbàtu
E di zinziédhhu t'à pintàtu
Pédi e pitticculu sólu
Si sò visti a primma bólu
A mitài tra gròghi e rui
Sò filmàti tutt'e dui
La ciurràta era ghjà bèddha
Merrulédhha Merrulédhha



Li Ciurràti a imprèstu o li Ciurràti imprestaticci

In Gaddhura l'ultimi 3 ciurràti di Ghjinnàghju, la dì 29, 30 e 31 sò chjamati "Li Ciurràti a imprèstu" o "Li Ciurràti imprestaticci".

Illi tempi antichi, lu mesi di Ghjinnàghju éra cumpostu di 29 ciurràti.

Un annu, fési un tempu bastanti beddhu chena fà fritu abbeddhu, cun pasculi beddhi e campagni fiuriti.

Un pasturédhhu chi aia un beddhu fióttulu di pécuri, sèndi la dì 29 e pinsendi chi lu mesi éra ghjà cumpritu, si 'antési e si cugliunési di Ghjinnàghju candu pudia invecei ringrazià pa' lu pasculu bonu chi l'aia datu.

Tandu, lu mesi di Ghjinnàghju, ammusciatu e attidiàtu pa' chistu stridu, dummandési 2 ciurràti a Friàghju chi, a chissu tempu, aia 30 dì.

Friàghju vi lli dunési a imprestu e Ghjinnàghju, pa' turrà lu stridu a lu pasturédhhu, pultési fritu, nì e tempu mali abbeddhu tantu di fa andà mali tutti li pécuri sói.

Riscisi a campassi sólu un pécura ammiriacata suttu a un pagghjólu mannu di ramu di li chi si trattani pa' fà lu casgiu.

Da la 'òlta, Ghjinnàghju no turrési più li ciurràti e imprestu a Friàghju chi filmési cun 28 dì e Ghjinnàghju ni mantinisi 31.

Li Ciurràti di la Mèrrula

Chisti ciurràti sò cunnòtti ancóra com'e "Ciurràti di la Mèrrula".

Una fòla faédhha di una merrulédhha cu' li piumi in culóri canu, sèndi 3 ciurràti di fritu, di nì e di tempu malu abbeddhu, pa' galdassi da lu fritu, s'ammiriachési indrentu a un fumaiólu e no iscisi finza a candu no turrési lu tempu bonu.

Candu iscisi, acchjarendisi da lu fumaiólu, la primma dì di Friàghju, s'agattési tutta nieddha di zinziédhhu.

Sigundu chistu contu, da chissa 'òlta li mèrruli sò filmati nieddhi.

